


18 AUGUST

**PARACLISUL
SF.CUVIOS
IOAN
DE LA RILA**

SOFIA, 1955



Канонъ молебный

Благословившу священнику, начинаемъ псаломъ 142-й: Гóсподи, услыши моли́тву мою... Сла́ва, и ны́нѣ. Аллилу́ія [3]. Та́же: Бо́гъ Госпо́дь... [4]

И тропарь преподо́бнаго, [гласъ 1]:

Покая́нія основа́ние, [прописа́ние умиле́ния, о́бразъ утѣше́ния, духо́внаго соверше́ния равноа́нгельное житі́е твоё бы́сть, преподо́бне. Въ моли́твахъ у́бо и въ поще́ніихъ и въ слеза́хъ пребыва́вый, отче Іоа́нне, моли́ Христа́ Бо́га о душа́хъ на́шихъ].

Сла́ва, и ны́нѣ, богоро́диченъ:

Гаврі́илу вѣща́вшу [Тебѣ́, Дѣ́во, ра́дуйся, со гласомъ воплоща́ешься всѣ́хъ Влады́ка въ Тебѣ́, святѣ́мъ киво́тѣ, я́коже рече́ праведный Дави́дъ, яви́лася еси́ шир́шая небесѣ́, поноси́вши Зижди́теля Твоего́: сла́ва Всель́шемуся въ Тя; сла́ва Проше́дшему изъ Тебе́; сла́ва Свобо́дившему насъ Рожде́ствомъ Твои́мъ].

И а́бие псаломъ 50-й: Помилуй мя́, Бо́же... Канонъ, гласъ 1, его́же краегранесіе: Диве́нь Бо́гъ во святы́хъ Свои́хъ, Бо́гъ Изра́илевъ.

ПѢСНЬ 1.

Ирмосъ: *Твоя побѣдительная десница боголѣпно въ крѣпости прославіся: та́ бо, Безсмертне, яко всемогущая, противныя сотре, израильтяномъ путь глубины новосодѣлавшая.*

Да́ждь ми́, блаже́нне, крѣ́пкую съ высоты́ по́мощь и просвѣще́ніе ра́зума, яко да равноа́нгельное твое́ на землі́ житі́е восхвалю́, имже исто́чникъ чуде́съ яви́лся еси́.

Иже въ Лива́нѣ ке́дру уподо́бился еси́, добродѣ́тели божѣ́ственныя преумно́живъ, и, яко дре́во насади́вся при исхо́дищихъ воды́ живы́я, осѣ́няеши ны́нѣ неду́жныхъ благода́тію.

Сла́ва: Вы́спрь житі́е на́ше яко слы́шавъ и на небесѣ́хъ пребыва́ніе, оста́вилъ еси́ зе́млю оте́чества твоего́, и мі́ра кра́сная презрѣ́лъ еси́, и къ вы́шней жи́зни впе́рїлся еси́.

И ны́нѣ, богоро́диченъ: Егда́ восхожда́ху небесни́и уми́ лѣ́ствицу Іа́кову и низхожда́ху, Твое́ стра́шное рождество́ тогда́ та́йно яви́ша, Богоро́дице, имже́ убо Бо́гъ на зе́млю сни́де, да челове́ки на не́бо вознесётъ.

ПѢСНЬ 3.

Ирмосъ: *Еди́не Вѣ́дый чело́вѣческаго существа́
немо́щъ и ми́лостивно въ не́ вообра́жся,
препо́яши мя съ вы́соты си́лою, еже вопи́ти
Тебѣ́, Святы́й: одушевле́нный хра́ме
неизрече́нныя сла́вы Твоея́, Чело́вѣколю́бче.*

Не роди́вся отъ по́хоти плотскі́я, я́ко безплóтенъ
пожилъ еси́ на землѣ́, и ча́до бы́лъ еси́ Вы́шняго
благодáтію, и я́ко жребі́й отéческій прія́лъ еси́
угото́ванное Ца́рство Того́ возлю́бльшимъ.

Благодáтію Ду́ха исполня́я заповѣ́дь
израи́льтяномъ Моисе́йскую, очисти́лъ еси́ тѣ́ло и
ду́шу дѣ́ньми мно́жайшими, на го́ру возше́дь, и
я́ко безплóтенъ пребыва́лъ еси́ та́мо, и
богovidѣ́нія сподóбился еси́.

Сла́ва: Отъ ю́ности украси́вся ра́зумомъ,
Соломо́нову му́дрость стяжа́лъ еси́ и, всю́ мі́ра
сего́ сла́стную пи́щу премину́въ, алчбо́ю и
болѣ́знію потща́лся еси́ нетлѣ́нную получи́ти,
всеблаже́нне.

И ны́нѣ, богоро́диченъ: Госпо́дь пе́рстомъ
написа́ въ Тебѣ́ Сло́во Безнача́льное, я́коже въ
глави́знѣ́ кни́жнѣ́й, Всепѣ́тая; тѣ́мже припада́ю
Ти́, моля́ся, въ кни́зѣ́ живото́нѣ́й мя написа́ти,
грѣ́ховъ рукописа́ніе растерза́ющи.

По сѣхъ а́біе поѣмъ:

Спаси́ отъ бѣ́дъ рабы́ твоя́, преподо́бне о́тче Іоа́нне, я́ко вси́ по Бо́зѣ къ тебѣ́ прибѣ́гаемъ, я́ко неруши́мому столпу́ и предста́телю.

При́зри благосе́рдіемъ, Всепѣ́тая Богоро́дице, на моё лю́тое тѣлесё озлобле́ніе и исцѣ́ли ду́ши моея́ болѣ́знь.

Та́же свяще́нникъ или діа́конъ екте́нію:

Помилуй на́съ, Бо́же, по вели́цѣй ми́лости Твое́й, мо́лимъ Ти ся, услы́ши и помилуй.

Ли́къ: Го́споди, помилуй [3].

Еще́ мо́лимся о святѣ́йшемъ отцѣ́ на́шемъ [и́мярекъ], Митрополі́тъ Софі́йстѣмъ и Патріа́рсѣ Болга́рстѣмъ, о высокопреосвяще́ннѣйшемъ Митрополі́тъ на́шемъ [и́мярекъ], о бра́тіяхъ нашихъ свяще́нницѣхъ, священномона́сѣхъ, священнодіа́конѣхъ и мона́сѣхъ, и о все́й во Христѣ́ бра́тіи на́шей.

Еще́ мо́лимся о благоче́стивомъ правосла́вномъ Болга́рстѣмъ наро́дѣ и христолю́бивомъ его́ во́инствѣ́.

Еще́ мо́лимся о ми́лости, жи́зни, ми́рѣ, здра́ви, спасе́ніи, посѣ́щеніи, прощ́еніи и оставле́ніи

грѣхѡвъ рабѡвъ Бѡжіихъ [**и поминаетъ имена, за нихже поется молебень**] и о еже умножитися лѣтомъ живота ихъ.

Еще молимся за всю братію и за вся христіаны.

Возгласъ: Яко милостивъ и человеколюбецъ Бѡгъ еси, и Тебѣ славу возсылаемъ, Отцѣ и Сыну и Святому Духу, нынѣ и присно и во вѣки вѣковъ. Аминь.

И абіе сѣдаленъ, гласъ 2:

Молѣніе тѣплое и стенаніе сердечное приносяще тебѣ, преподобне отче Іоанне, прилѣжно вопіемъ ти: предвари и отъ бѣдъ избави насъ, яко скорый помощникъ и тѣплый нашъ предстатель.

Пѣснь 4.

Ирмосъ: *Гору Тя, благодатию Божіею приосѣненную, прозорливима Аввакумъ усмотривъ очима, изъ Тебѣ изыти Израилеву провозглашае Святому, во спасеніе наше и обновленіе.*

Видѣніе Даніилово разсмотривъ, яко отъ горы отторжеся камень несѣченый и въ прахъ идольское сокруши мучительство, обрѣлъ еси на горѣ краеугольный Камень, Христа, злобу всю сокрушающа.

Огнѣмъ да не опалѣтся содомскимъ, а́нгель
 Ло́тови повелѣ́ва́ше на го́рѣ спасти́ся, ты́ же,
 ра́вное тому́ рве́ніе воспрі́ймъ и на го́ру
 возше́дь, та́мо жи́ти изво́лилъ еси́ и пла́мене
 стра́стнаго избѣ́жалъ еси́.

Сла́ва: Смирѣ́нно послѣ́довалъ еси́ жезло́мъ
 позва́вшему тя Па́стырю и, я́ко овча́ незло́биво,
 зе́ліемъ го́рнимъ пита́лся еси́; ны́нѣ же на
 па́жити райстѣ́й поко́ище обрѣ́тъ, на вода́хъ
 пи́щныхъ насыща́ешься.

И ны́нѣ, богоро́диченъ: Вкуси́ Ада́мъ печа́ль
 пло́да дре́вняго, же́ну послу́шавъ, Ты́ же,
 Чи́стая, гла́съ арха́нгела воспрі́ймши, — се́ Раба́
 Госпо́дня! — возо́пѣвши и Бо́га поро́ждши,
 ра́дость въ ми́ръ ввела́ еси́.

Пѣ́снь 5.

Ирмо́съ: *Просвѣ́тѣвый сія́ніемъ прише́ствія
 Твоего́, Христе́, и освѣ́тѣвый кресто́мъ Твои́мъ
 мі́ра концы́, сердца́ просвѣ́ти́ свѣ́томъ Твоего́
 богора́зумія правосла́вно пою́щихъ Тя́.*

Я́коже а́нгель на землі́ пребы́въ, возде́ржа́ніемъ
 Крестите́лю уподо́бился еси́, пусты́нному
 воспита́нію, преподо́бне; ны́нѣ же хлѣ́бомъ
 а́нгельскимъ пита́йся по пи́санному, насы́ти
 ду́ши на́ша благода́тію.

Твоё дерзновѣніе, ёже къ Бо́гу, неора́нно прозя́бый слану́токъ проповѣ́дуетъ, о́тче, и́мже сама́го себѣ дивно пита́лъ еси́, я́коже естество́мъ плоти́ обложе́ннаго, и и́же къ тебѣ́ приходя́щія.

Сла́ва: Истинная наде́жда не посрами́ тебе́, блаже́нне, увѣ́дѣвша́ бу́дущую славу́, къ не́йже недостойна́ вмѣ́нилъ еси́, я́же на земли́ боре́нія и дерзнове́нно къ по́стническимъ страсте́мъ устремилъ еси́.

И ны́нѣ, богоро́диченъ: Хи́тростію змія́ Ада́мъ божество́вныя ризы́ совлече́ся и въ ризу́ ко́жаную одѣ́яся; отъ Тебе́ же плоть́ при́ймъ, Зиждите́ль мо́й дебелы́ства плоти́ совлече́ мя и въ пе́рвую мя па́ки оде́жду одѣ́я.

Пѣ́снь 6.

Ирмо́съ: *Обы́де на́съ послѣ́дняя без́дна, нѣ́сть изба́вля́й, вмѣ́нихомся́, я́ко о́вцы заколе́нія, спаси́ лю́ди Твоя́, Бо́же на́шъ, Ты́ бо крѣ́пость немо́щству́ющихъ и исправле́ніе.*

Свѣ́томъ пе́рвымъ облиста́вся, бы́лъ еси́ свѣти́льникъ, блаже́нне, и а́нгеломъ подо́бникъ, безпреста́нно по́я въ моли́твахъ всено́щныхъ Еди́наго Бо́га, Его́же и сы́нъ благода́тію яви́лся еси́.

Волнующееся бурею море житія оставилъ еси,
погружающее нехотящихъ на небо вознестися, и
вся прешелъ еси мірскія прилоги, нагъ бѣгая
искушеній лукаваго.

Слава: Обрѣлъ еси Бога, всельшася въ тя, не
давъ покоя скраніама твоима, ни веждама
твоима дреманія, и, яко безплотенъ во плоти
поживъ, въ небесныя храмы вселился еси.

И нынѣ, богородиченъ: Искáпай капли
щедротъ, облаче небесный, Чистая Дѣво, якоже
руно пріимшая дождь и якоже каплю — Бога во
чрѣвѣ, и страстей моихъ потоки изсуши.

И паки: Спаси отъ бѣдъ рабы твоя... **и Призри**
благосердіемъ..., **якоже по 3-й пѣсни. Таже**
ектенія малая, и по възгласѣ абіе

Кондакъ, гласъ 2. Подобенъ: Въ молитвахъ
Неусыпающую.

Молящимъ ты теплѣйшій заступниче и
просящимъ скорѣйшій послушателю,
преподобне отче Іоанне, пріими моленіе наше и
Христа умоли помилovati насъ, Единаго
Преблагаго и Многомилостиваго.

Прокименъ, гласъ 4: Честна предъ Господомъ*
смерть преподобныхъ Его.

Стихъ: Чтѡ возда́мъ Го́сподеви о всѣхъ, я́же
воздаде́ ми?

Священникъ: И о сподо́битися на́мъ слы́шанію
свята́го Ева́нгелія, Го́спода Бо́га мо́лимъ.

Пре́мудрость, прѡсти, услы́шимъ свята́го
Ева́нгелія. **Миръ** всѣмъ. **Отъ** Матѳе́я свята́го
Ева́нгелія чтѣ́ніе.

И чтѣть за́чало 43:

Рече́ Госпо́дь Свои́мъ ученико́мъ: вся́ Мнѣ́
предана́ су́ть Отце́мъ Мои́мъ. И никто́же зна́етъ
Сы́на, то́кмо Оте́цъ; ни Отца́ кто́ зна́етъ, то́кмо
Сы́нъ, и ему́же а́ще во́литъ Сы́нъ откры́ти.
Прииди́те ко Мнѣ́ вси́ тружда́ющіися и
обременѣ́ннии, и Азъ упоко́ю вы́. Возми́те и́го
Моё на себѣ́ и научи́теся отъ Мене́, я́ко кро́токъ
ёсмь и смире́нъ се́рдцемъ, и обря́щете поко́й
душа́мъ ва́шимъ. Иго́ бо Моё́ благо, и бре́мя моё́
легко́ ёсть.

И а́бие: Сла́ва, гла́съ 2: Моли́твами
преподо́бнаго, Ми́лостиве, очисти́ мно́жества
согрѣ́шеній нашихъ. **И ны́нѣ:** Моли́твами
Богоро́дицы... **Та́же стихъ:** Помилуй́ мя, Бо́же...

И стихи́ра, гла́съ 6:

Моле́бное пѣ́ніе творя́ще богоно́сному отцу́,
прииди́те, припаде́мъ къ честнѣ́й ра́цѣ мо́щей

его́, изъ глѹбини́ серде́чныя взыва́юще: уго́дниче Христо́въ, преподо́бне Іоа́нне, не прѣзри ма́лаго нашего́ пѣ́нїя, недостойны́ми устна́ми тебѣ́ приноси́мага, но прїими́ моле́ніе на́ше и низпосли́ намъ́ свы́ше бога́тую по́мощь, отъ напа́стей ны́ изба́вляя твои́ми къ́ Бо́гу моли́твами, всеблаже́нне и досточу́дне о́тче.

Священникъ:

Спаси́, Бо́же, лю́ди Твоя́ и благослови́ достоя́ніе Твое́, посѣ́ти міръ Тво́й ми́лостію и щедро́тами, возвы́си ро́гъ христі́анъ правосла́вныхъ и низпосли́ на ны́ ми́лости Твоя́ бога́тыя, моли́твами всепречи́стыя Влады́чицы на́шея Богоро́дицы и Приснодѣ́вы Марі́и, си́лою Честна́го и Животворя́щаго Креста́, предста́тельствы честныхъ́ небѣ́сныхъ си́лъ безплотныхъ́, моли́твами честна́го, сла́внаго проро́ка, Предте́чи и Крестите́ля Іоа́нна, святы́хъ сла́вныхъ и всехва́льных апо́столъ, святы́хъ, сла́вныхъ и добропобѣ́дныхъ мучениковъ́, преподо́бныхъ и богоно́сныхъ о́тець нашихъ́, иже во святы́хъ о́тець нашихъ́ и вселѣ́нскихъ вели́кихъ учи́телей и святи́телей, Васи́лія Вели́каго, Григо́рія Богосло́ва и Іоа́нна Златоуста́го, иже во святы́хъ о́тца́ нашего́ Нико́лая, архіе́пископа Му́рликі́йскаго, чудотворца́, святы́хъ равноапо́стольныхъ́

славяноболгарскихъ просвѣтителей Меѳодія и Кирилла, и святыхъ учениковъ ихъ Климента и Наума, Охридскихъ чудотворцевъ, Саввы, Горазда и Ангеларія, святаго благовѣрнаго царя Бориса, преподобнаго и богоноснаго отца нашего Іоанна, пустыножителя Рылскаго чудотворца, иже во святыхъ отца нашего Иларіона, епископа Мегленскаго, и Евѣимія, патріарха Терновскаго, преподобныхъ и богоносныхъ отецъ нашихъ Гавріила Лѣсновскаго, Іоакима Осоговскаго, Прохора Пшинскаго и Θεодосія Терновскаго, святыхъ славныхъ и добропобѣдныхъ мучениковъ Георгія Побѣдоносца и Димітрія Муроточиваго, святыхъ мученикъ Георгія, Георгія и Николая Софійскихъ, и святаго **[егоже есть храмъ]**, святыхъ и праведныхъ богоотецъ Іоакима и Анны и святаго **[егоже есть день]**, егоже и память совершаемъ, и всѣхъ святыхъ, молимъ Тя, многомилостиве Господи, услыши насъ, грѣшныхъ, молящихся Тебѣ, и помилуй насъ.

Ликъ: Господи, помилуй, [12].

Возгласъ: Милостію и щедротами и человеколюбіемъ единороднаго Сына Твоего, съ Нимже благословенъ еси, со Пресвятымъ, и благимъ, и животворящимъ Твоимъ Духомъ, нынѣ и присно, и во вѣки вѣковъ.

ПѢСНЬ 7.

Ирмосъ: Тебѣ, ѹмную, Богородице, пѣщь
разсмотримъ, вѣрнии, якоже бо ѡтроки спасе
три Превозносимый, мѣръ обновѣ, во чревѣ
Твоемъ всецѣль, хвальный отецъ Богъ и
препрославленъ.

Храбрый ревнитель бывъ Иліи пророку, на
страсти устремился еси оружіемъ поста и, на
горѣ водворяясь, алчбою паче человѣкъ,
постнически умертвилъ еси срамныя помыслы.

Божія пути прѣваго восхотѣвъ, и мѣрскаго
желанія отвергся, и на камени разумнѣмъ стопы
души твоея утвердивъ, камене соблазна при
стези всѣхъ избавляеши и прилоговъ искушеній.

Слава: Окрестъ раки мощей твоихъ точатся
чудеса исцѣленій приходящимъ, Богу бо конечнѣ
угодилъ еси, вѣрующимъ обѣщавшему рѣки изъ
чрева источити Божественныя благодати.

И нынѣ, богородиченъ: Глубинѣ слышимъ
премудрости, Пречистая, яко Создавшаго рукою
Адама и отъ ребра Еву Сотворшаго Слова
воплотила еси, Иже, въ ребра на Крестѣ
пробожденъ, родъ человѣческой обновѣ.

ПѢСНЬ 8.

Ирмосъ: Въ пеши́ ѡтроцы Изра́илевы, ꙗкоже въ горни́лѣ, добро́тою благоче́стія чистѣ́ злата блеща́хуся, глаго́люще: благослови́те, вся́ дѣла́ Господня́, Господа́, пойте́ и превозноси́те во вся́ вѣ́ки.

Иску́съ врага́ доблемудренно отрази́въ во бра́ни крѣ́пцѣй и непобѣ́димъ яви́вся бѣ́совскими кова́рствы, побѣ́дными вѣ́нцы увяза́лся еси́ и, Господеви ны́нѣ предсто́я, мо́лишися о воспѣ́вающихъ тя́.

Сме́ртнѣй кончи́нѣ приспѣ́вшей вре́меннѣй, остави́лъ еси́ труды́ по́стническія, и, вѣ́чный поко́й воспри́имъ, Бо́гу предсто́иши, и, посре́ди луче́й неизрече́ннаго Божества́ сі́яя, о насъ мо́лишися.

Сла́ва: Ра́внѣ́ дре́внему патріа́рху Іа́кову ва́рь дневны́й понесе́ и студе́нь но́щную претерпѣ́въ, возше́лъ еси́ лѣ́ствицею́ добродѣ́телей на вы́соту боговидѣ́нія, ѡ́тче Іоа́нне, чуде́сь исто́чниче.

И ны́нѣ, богоро́диченъ: Агни́це Пречи́стая, къ Тебѣ́ прибѣ́гаю: ду́шу мою́, страстьми́ оскверне́нную, вода́ми омы́й слѣ́зными, вода́ми благода́ти Ду́ха Бо́жія́ глубо́кій ка́ль грѣ́хъ челове́ческихъ омы́вшая.

ПѢснь 9.

Ирмосъ: *Образъ чистаго рождества Твоего
огнепалимая купина показана неопальная; и нынѣ
на насъ напастей свирѣпящую угасити,
молимся, нещъ, да Тя, Богородице, непрестанно
величаемъ.*

Изящныя почести подвига твоего воспріялъ еси
терпѣніемъ твоимъ, егѡже ради со ангелы
водворяеши и за наготу тѣлесную въ небесную
ризу облѣкся еси, въ постницѣхъ всеизрядне.

Любомудрыхъ соборище, виждь, каковыми
благодатями воздаеть Богъ истинно Того
доброты вождѣвшимъ: ни естество бо, ни
время тѣлесѣ Іоанна пустыннолюбнаго побѣди,
точащаго чудеса даже донынѣ.

Слава: Елико сила скрижали сердца моего
распростѣръ, вся написахъ многія твоя
благодати, но достойна ничесѡже принесохъ
тебѣ; тѣмже молю тя: вѣру пріими и любовь,
преблаженне.

И нынѣ, богородиченъ: Вонми Давидскихъ
гуслей провъщанію, Дщи Царѣва, и приклони
ухо Твое. Людей Твоихъ не забуди, но ущедри,
Дѣвице, иже непрестанно Тя славящихъ.

Та́же: Досто́йно е́сть я́ко вои́стину блажи́ти Тя́ Богоро́дицу, присноблаже́нную и пренепоро́чную и Ма́терь Бо́га на́шего. Честни́йшую херувимъ и сла́вни́йшую безъ сравне́нія серафимъ, безъ иста́вля́нія Бо́га Сло́ва ро́ждшую, су́щую Богоро́дицу, Тя́ велича́емъ.

И кади́тъ священникъ олта́рь, иконоста́съ и лю́ди, мы́ же поёмъ настоя́щія тропари́ преподо́бнаго, [гласъ 2]:

А́нгела земна́го въ пѣ́снехъ почти́мъ, Іоа́нна, и гражда́нина небесна́го, при́сно предстоя́щаго въ свѣ́тлостехъ со а́нгельскими ли́ки престо́лу Святы́я Тро́ицы.

О́тъ мно́гихъ мои́хъ и лю́тыхъ грѣ́ховъ немо́щству́етъ тѣ́ло, немо́щству́етъ и ду́ша моя́: къ тебѣ́ при́бѣгаю, моля́ся, преподо́бне, спаси́ мя, ока́яннаго, въ си́хъ погиба́юща.

Скоро́ приими́ мо́льбы́ на́ша, пла́чь же и слéзы недосто́йныхъ ра́бъ твои́хъ, и при́сно о насъ моли́ся преблагóму Бо́гу, Іоа́нне блаже́нне, Бо́жій уго́днице.

Поёмъ вси́ прилѣ́жно пѣ́снь тебѣ́ ны́нѣ, всеблаже́нне Іоа́нне, и вопі́емъ: о́тъ бѣ́дъ насъ изба́ви и бу́ди на́мъ помо́щникъ, честну́ю твою́ па́мять вѣ́рно почита́ющимъ.

**Вся́ а́нгеловъ во́инства, Предте́че Госпо́день,
апо́столовъ ли́че ве́сь и всѣ́хъ святы́хъ чѣ́ни,
прилѣ́жно съ Богоро́дицею благо́му Бо́гу о на́съ
при́сно моли́теся.**

И а́бие: Трисвято́е, и по Отче на́шъ.

Священникъ: Я́ко Твое́ е́сть Ца́рство... Ами́нь.

**Тропа́рь: Покая́нія основа́ние... Сла́ва, и ны́нѣ:
Гаврі́илу вѣ́щавшу...**

И е́ктенія́ сугу́бая:

**Поми́луй на́съ, Бо́же, по вели́чѣй ми́лости Твое́й,
мо́лимъ Ти ся, услы́ши и поми́луй.**

Ли́къ: Го́споди, поми́луй [3].

**Е́ще мо́лимся о́ святѣ́йшемъ о́тцѣ́ на́шемъ
[и́мярекъ], Метропо́литѣ́ Софі́йстѣ́мъ и
Патріа́рсѣ́ Болга́рстѣ́мъ, о
высокопреосвященнѣ́йшемъ Метропо́литѣ́
на́шемъ [и́мярекъ], о бра́тіяхъ на́шихъ
священни́цѣхъ, священномона́сѣхъ,
священнодіа́конѣхъ и мона́сѣхъ, и о все́й во
Хри́стѣ́ бра́тіи на́шей.**

**Е́ще мо́лимся о́ благоче́стивомъ правосла́вномъ
 Болга́рстѣ́мъ наро́дѣ́ и христолю́бивомъ его́
вои́нствѣ́.**

Еще мо́лимся о ми́лости, жи́зни, ми́ръ, здра́ви, спасе́нии, посѣ́щеніи, прощѣ́нии и оста́вленіи грѣ́ховъ рабо́въ Бо́жихъ [**и поминаетъ имена, ихже хочетъ**] и о́ еже умно́житься лѣ́томъ живота́ ихъ.

Еще мо́лимся, и о́ еже сохра́нѣтиса свѣ́тѣй обите́ли се́й [**или: свя́тому хра́му се́му, или: честно́му до́му се́му**], и вся́кому гра́ду и странѣ́, отъ гла́да, губи́тельства, тру́са, пото́па, огня́, мечѧ́, на́шествіѧ́ инопле́менныхъ и междоусо́бныѧ́ бра́ни; о́ еже ми́лостиву и благоува́тливу бы́ти благо́му и челове́колюбиво́му Бо́гу на́шему, отврати́ти вся́кій гнѣ́въ, на ны́ дви́жимый, и изба́вити ны́ отъ нале́жащаго и пра́веднаго Своего́ преще́ніѧ, и поми́ловати ны́. [**Ликъ:**] Го́споди поми́луй. **[40.]**

Священникъ: Услы́ши ны́, Бо́же Спаси́телю на́шъ, упова́ніе всѣ́хъ концевъ́ земли́ и су́щихъ въ мо́ри далече́, и ми́лостивъ, ми́лостивъ бу́ди, Влады́ко, о грѣ́сѣхъ на́шихъ, и поми́луй ны́. Ми́лостивъ бо и челове́колюбе́ць Бо́гъ еси́, и Тебѣ́ сла́ву возсыла́емъ, Отцу́ и Сы́ну и Свя́тому Ду́ху, ны́нѣ и прѣ́сно и во вѣ́ки вѣ́ковъ. Ами́нь.

Таже: Па́ки и па́ки, прекло́ньше колѣ́на, ко преподо́бному и богоно́сному отцу́ на́шему Іо́анну, пустыножи́телю Ры́льскому, помо́лимся.

Ликъ: Преподобне отче Іоанне, моли́ Бо́га о насъ.

И чтѣть священникъ кую-либо изъ молитвъ акаѳистныхъ, или же настоящую молитву:

О, преподобне отче Іоанне, уго́дникъ Госпо́день преизрядный, тёплый нашъ заступниче и вездѣ въ скорбехъ скорый помощниче! Помози́ мнѣ, грѣшному и унылому, въ настоящемъ семъ житіи́ и умоли́ Го́спода Бо́га даровати́ ми оставленіе всѣхъ моихъ грѣховъ, ели́ко согрѣшихъ отъ юности моея во всѣмъ житіи́ моемъ дѣломъ, словомъ, помышленіемъ и всѣми моими́ чувствы. И во исхо́дъ души́ моея помози́ ми, окаянному, и умоли́ Го́спода Бо́га, всея́ твари́ Содѣтеля, изба́вити мя возду́шныхъ мытарствъ и вѣчнаго мученія, да всегда́ прославляю́ Отца́ и Сы́на и Свята́го Ду́ха, и твоѣ́ милостивное предста́тельство, ны́нѣ, и прі́сно, и во вѣ́ки вѣ́ковъ.

И отпу́сть.

Источникъ: Богослужебная послѣдованія на все лѣто преподобному и богоносному отцу нашему Іоанну Рыльскому, съ **приложеніемъ**. † *Левкійскій епископъ Парѳеній*. — Софія: Синодально издательство, 1955. — Л. 169-180.